

01 NOV 1997

#### ANSARA NAK BANTU WUJUDKAN KELAS MELAYU PROFESIONAL

KUALA LUMPUR, 1 Nov (Bernama) -- Bermula dengan program untuk meningkatkan mutu pendidikan di Malaysia, Ansara, di bawah kepimpinan presidennya Mukhriz Mahathir, maju setapak lagi ke arah mewujudkan usahawan menengah Melayu profesional.

Matlamat baru Ansara atau gabungan persatuan pelajar lepasan Maktab Rendah Sains Mara, lahir dari idea untuk menggabungkan ahli persatuan dari golongan usahawan dan profesional yang sebelum ini terasing.

Bercakap kepada pemberita selepas perasmian seminar "Ke Arah Pengwujudan Kelas Menengah Melayu Yang Mapan" di sini hari ini, Mukhriz berkata di peringkat awal, aktiviti utama lebih untuk mengeratkan jaringan antara bekas pelajar.

"Kita dapati ramai ahli Ansara terdiri daripada profesional yang bekerja di bawah pengurusan orang lain dan satu lagi daripada golongan usahawan.

"Harapan kami dengan mengeratkan jaringan boleh membawa manfaat kepada semua anggota untuk mewujudkan kelas usahawan profesional baru dari kalangan ahli," kata Mukhriz.

Untuk tujuan tersebut, Ansara akan mengadakan perhubungan yang lebih erat dengan Kementerian Pembangunan Usahawan bagi memberikan lebih pendedahan mengenai peluang-peluang yang ada.

Sejak ditubuhkan empat tahun lalu, Ansara telah bergiat secara aktif menyumbangkan pandangan tentang sistem pendidikan di MRSM. Seramai empat dari tujuh panel penasihat di MRSM terdiri dari anggota Ansara.

Persatuan tersebut bergiat secara aktif mengeluarkan video bimbingan kerjaya untuk diedarkan di semua MRSM di seluruh negara dan kepada lebih 400 sekolah di Malaysia secara percuma.

Menurut Mukhriz, keanggotaan Ansara di masa depan diharap akan bertambah dengan penyertaan lain-lain maktab dan maktab sains yang berjumlah 23 kesemuanya berbanding hanya sembilan penyertaan sekarang.

"Jika kesemua bekas pelajar bergabung, kita mempunyai hampir 34,000 ahli," katanya.

Ditanya sama ada Ansara mempunyai rancangan untuk bergabung dengan gabungan bekas penuntut Maktab Melayu Kuala Kangsar (MCOBA), yang telah lama ditubuhkan, dalam usaha mengukuhkan dan mempercepatkan proses mewujudkan usahawan Melayu profesional, Mukhriz berkata mungkin langkah itu akan diambil di masa depan.

"Buat masa ini biar kami mengukuhkan kedudukan persatuan (Ansara) dahulu," katanya.

Sementara itu, Menteri Pembangunan Usahawan Datuk Mustapa Mohamed yang turut hadir di majlis tersebut memberi jaminan akan terus memberi kerjasama kepada Ansara memandangkan usaha persatuan tersebut dapat memberi manfaat kepada pelajar-pelajar dari MRSM, yang berada di bawah kementeriannya. --

BERNAMA

ZMY SIA